



Sarajevo, 04.07.2025.

**PREDSTAVNIČKI DOM
PARLAMENTARNE SKUPŠTINE
BOSNE I HERCEGOVINE**

n/r predsjedavajućeg

 BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 04-07-2025			
Organizaciona jedinica	Klasifikaciona oznaka	Redni broj	Broj priloga
01-	10-1-	1490/	26

U skladu s članom 166. i 170. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“ br. 79/14, 81/15 i 97/15, 78/19, 26/20, 53/22, 59/23, 87/23, 50/24 i 73/24), postavljam sljedeće

POSLANIČKA PITANJA

1. *Da li vam je poznat problem mogućnosti zabrane i isključenja bosanskohercegovačkih kompanija iz procesa javnih nabavki u Evropskoj uniji iz razloga činjenice da Bosna i Hercegovina nije potpisnik Sporazuma o javnim nabavkama (GPA) Svjetske trgovinske organizacije? Šta je konkretno do sada poduzeto sa vaše strane po ovom pitanju?*
2. *Da li Ministarstvo vanjske trgovine i ekonomskih odnosa Bosne i Hercegovine ima izrađenu procjenu posljedica po bh. privredu po osnovu onemogućavanja obavljanja njihove privredne djelatnosti na teritoriji Evropske unije usljed pomenutih zabrana? Ukoliko posjedujete ovakvu analizu molim vas da je dostavite.*
3. *Da li vam je poznato da su pojedine zemlje članice EU od kojih sa nekima ostvarujemo značajnu trgovinsku razmjenu već usvojile propise kojima ugovornim organima omogućuju zabranu pristupa postupku javne nabavke kompanijama iz „trećih zemalja“ u koje spada i Bosna i Hercegovina? Koje ste međunarodne aktivnosti poduzeli po ovom pitanju, a u cilju zaštite bosanskohercegovačkih kompanija?*
4. *Zašto Bosna i Hercegovina nije potpisnica Sporazuma o javnim nabavkama (GPA) Svjetske trgovinske organizacije, koje su prepreke za to i ko je odgovoran?*
5. *Koja je adresa na kojoj bh. kompanije eventualno mogu tražiti odgovornost ili naknadu potencijalne štete zbog novonastale situacije i spriječenosti u nastavku obavljanja privredne djelatnosti u zemljama Evropske unije?*
6. *Molim vas da dostavite pregled aktivnosti zemalja Evropske unije po pitanju toga koje su zemlje već sada provele aktivnosti kojima onemogućuju učešće bh. kompanija u procesu javnih nabavki i na koji način, te koje zemlje to planiraju u narednom periodu i na koji način?*

Obrazloženje:

Prema informacijama sa kojim raspolazem započet je proces pravnog isključivanja bosanskohercegovačkih kompanija iz procesa javnih nabavki u Evropskoj uniji.

Razlog tome je činjenica da Bosna i Hercegovina nije potpisala Sporazum o javnim nabavkama (GPA) Svjetske trgovinske organizacije.

Ovo činjenično stanje bi moglo nanijeti nesagledive posljedice po bh. privredu na način da će kroz zabranu učešća u postupcima javne nabavke u zemljama EU privredna aktivnost nekih od najuspješnijih bh. kompanija biti svedena na drastično manje tržište nego što je to bilo do sada, te da će iste te kompanije prisiliti da svoje poslovanje izmjestе izvan Bosne i Hercegovine što bi imalo širok spektar štetnih posljedica.

Kao potvrda svega rečenog može poslužiti i činjenica o nedavno usvojenom Pravilniku u susjednoj Republici Hrvatskoj u kojem se definiše mogućnost ugovornim organima da zabrane pristup postupku javne nabavke kompanijama iz zemalja koje nisu potpisale pomenuti Sporazuma o javnim nabavkama (GPA) Svjetske trgovinske organizacije. Ovaj Pravilnik je usvojen 23.05.2025. godine, a na snazi je od 26.06.2025. godine. Pored R.Hrvatske postoje i druge države koje su na isti ili sličan način definisale ove zabrane, od kojih neke i kroz zakonska rješenja.

Imajući u vidu da je tržište javnih nabavki u EU vrijedno 2000 milijardi eura, činjenicu da su do sada bh. kompanije učestvovalе u istom, te moguće katastrofalne posljedice i potencijalno ugrožavanje strateških ekonomskih interesa Bosne i Hercegovine, kao i jasan poziv institucija Evropske unije da se provedu aktivnosti kojima bi se prevenirale izuzetno štetne posljedice po privredu i državu u cjelini, postavljam gore navedena pitanja i molim za odgovor u što je moguće kraćem roku.

Pitanje postavljam:

- Predsjedavajućoj Vijeća ministara Bosne i Hercegovine
- Ministru vanjske trgovine i ekonomskih odnosa Bosne i Hercegovine
- Direktoru Agencije za javne nabavke Bosne i Hercegovine
- Predsjedniku Vanjskotrgovinske komore Bosne i Hercegovine

Odgovor tražim u pisanoj formi, u skladu s članom 171. Poslovnika Predstavničkog doma Parlamentarne skupštine BiH.

Poslanik SDP BiH
Saša Magazinović

